

ORDENSREGLEMENT FOR SKJOLD SKULE

1. Lovheimel

Ordensreglementet er heimla i

1. Opplæringslova, § 2-9:

”Kommunen skal gi forskrifter om ordensreglement for den enkelte grunnskolen.

Reglementet skal gi reglar om rettane og pliktene til elevane så langt dei ikkje er fastsette i lov eller på annan måte. Reglementet skal innehalde reglar om åtferd, reglar om kva tiltak som skal kunne brukast mot elevar som bryt reglementet og reglar om framgangsmåten når slike saker skal behandlast.”

Kommunestyret har delegert vedtaksretten i §2-9 til rådmannen, som har delegert vidare til rektor ved skulen.

2. Opplæringslova §9a-2:

«Alle elevar har rett til eit trygt og godt skolemiljø som fremjar helse, trivsel og læring»

2. Verkeområde

Ordensreglementet gjeld i skuletida, på skulevegen og ved tilstellingar under leing av skulen.

Punkt 1-7 gjeld for alle skulane i Vindafjord. Den einskilde skulen kan i tillegg ha utfyllande reglar, tilpassa lokale tilhøve. Dette har punkt nr. 8.

3. Åtferd

Alle skal visa omsyn og respekt for andre, slik at ein ikkje skadar, sårar eller er til plage for medelevar eller vaksne på skulen.

Det er ikkje lov å bruka eller ta med nokon form for rusmidlar på skulen.

4. Undervisningssituasjonen

Det skal vera ro og orden i samband med opplæringa. Elevar skal møta førebudde, vera punktlege, visa god arbeidsinnsats, ha med nødvendige læremiddel og følgja opp avtalt arbeid.

5. Eigedom

Alle har rett til å ha tinga sine i fred. Skade på eigedom kan måtta reparerast eller erstattast.

6. Konsekvensar ved brot på ordensreglementet

1. Irettesetjing

2. Melding heim, skriftleg eller munnleg. Eleven skal vera orientert når merknad blir sett.

3. Samtale med elev og foreldre / føresette.

4. Eleven kan i ein periode få avgrensa rettar på skulen.

5. Utvising frå skulen etter gjeldande reglar. Jmfr. Opplæringslova §2-10:

”Kommunen kan fastsetje i ordensreglementet at elevar på årstrinna 8-10 som alvorleg eller fleire gonger bryt reglementet, kan visast bort frå undervisninga i inntil tre dagar, og at elevar på årstrinna 1-7 kan visast bort frå undervisninga for enkelttimar eller for resten av dagen. Rektor sjølv vedtek bortvising etter å ha rådført seg med lærarane til eleven. Før det blir gjort vedtak, skal ein ha vurdert å bruke andre hjelpe- eller refsingstiltak. Foreldra til elevar på årstrinna 1-7 skal varslast før det blir sett i verk bortvising for resten av dagen. Med mindre kommunen fastset noko anna, kan rektor bestemme at lærarane skal ha mynde til å ta avgjerd om bortvising frå eiga undervisning for ei opplæringsøkt, avgrensa til to klokketimar.”

På ungdomsskulen skal det vurderast om brotet fører til nedsett karakter, jmf. p 7.

7. Vurdering i orden og åtferd

Vurdering i orden og åtferd er ein del av undervegsvurderinga. Det skal givast halvårsvurdering utan karakter i orden og åtferd i heile opplæringsløpet.

I ungdomsskulen blir det i tillegg sett karakter i orden og åtferd, jmf. Forskrift til Opplæringslova §3-5.

Kriteria for dei ulike karakterane er sette slik her i kommunen:

Orden

Karakteren "god":

Ein elev som utan kommentar får denne karakteren, har få brot på ordensreglane, viser god arbeidsinnsats og kjem førebudd og presis til timane.

Karakteren "nokså god":

Ein elev som får denne karakteren har fleire ulike brot på ordensreglane eller stadig gjentekne like brot eller dårleg arbeidsinnsats eller ofte for seint til timane eller for seint eller ikkje levert arbeid.

Karakteren "lite god":

Karakteren blir gitt dersom det er ein elev som har gjentekne brot på ordensreglementet, leverer sjeldan, har ulovleg fråvær. Det er då snakk om merknader mest kvar veke.

Åtferd

Karakteren "god":

Karakteren blir gitt til elevar som viser ei normal grei åtferd mot medelevar og vaksne.

Karakteren "nokså god":

Denne karakteren kan ein elev få dersom han har to eller fleire alvorlege episodar mot medelev eller lærar eller generell dårleg åtferd mot medelev (erting, kommentarar, tydeleg negativ kroppsspråk) eller generell dårleg åtferd mot vaksne på skulen (frekke kommentarar, negativt kroppsspråk, uro i timar, nekting), eller juks, uærleg framferd, eller røyking eller bruk av rusmidlar.

Karakteren "lite god":

Denne karakteren blir gitt dersom det er ein elev som generelt viser liten vilje til å visa normal åtferd, ikkje rettar seg etter påtale og som treng påminning om rett åtferd mest kvar veke. Det skal vera ro og orden i samband med opplæringa. Elevar skal møta førebudde, vera punktlege,

8. Lokale konkretiseringar: På Skjold skule gjeld i tillegg desse lokale reglane:

8.1 Uteområdet:

Skuleområdet er avgrensa av Skjold stadion 2 (den minste kunstgrasbanen), gangvegen opp til Bygdahuset og dei nedre hushjørnene, ballbingen, løpebanen rundt Skjold stadion 1 (den største kunstgrasbanen), Kyrkjevikvegen (vegen ned til Skogland), gjerdet på austsida av skulen.

8.2 Friminutta:

Elevane på barnetrinnet skal vera ute i friminutta dersom ikkje lærar har bestemt noko anna for enkeltfriminutt eller enkeltdagar. Elevane kan vera inne første del av matfriminuttet. Elevane på ungdomstrinnet har egne reglar for opphald inne i friminutta. Brot på desse vil føra til ordens- eller -åttferdsmerknader.

Yttertøy og sko skal takast av på gangen, og setjast/ hengjast på plass før timen.

10.klasse har lov til å gå kvar dei vil i storfriminuttet, så lenge dei er tilbake når neste time startar. Denne retten kan bli teke bort utan forvarsel dersom det ligg mykje søppel i vegen eller det skjer andre uønska episodar.

For andre elevar er det kontaktlærar som avgjer om elevar kan gå utanfor skuleområdet.

8.3 Leik:

Inspiserande vaksne skal stoppa farleg leik. Rektor eller inspektør kan avgjera at enkelte leiker ikkje skal kunne nyttast. Pr. i dag gjeld desse avgrensingane for leik:

- Rulleskøyter berre på flaten framfor kontora, rullebrett og sparkesykkel i skateparken, under føresetnad av at verneutstyr (minimum hjelm) blir brukt.
- Ikkje klatring i tre der det er risiko for å falla ned på asfalt eller murkantar.
- Det skal ikkje kastast snøball.

8.4 Sykling:

Syklar skal stå i/ved sykkelstativa. Sykkel skal ikkje nyttast i skuletida. Kontaktlærar kan gje unntaksløyve.

8.5 Snop, m.m.:

Snop skal ikkje nyttast på skuleområdet, utan ved særskilde høve. Elevane i 5.10. klasse har ikkje forbod mot tyggegummi.

8.6 Telefon:

Det er ikkje lov å bruka mobiltelefon i undervisningstida, utan etter avtale med lærar.

Telefonen skal vera ute av syne og slått av eller i lydlaus-modus. Mobiltelefonen må aldri brukast på ein måte som skadar, sårar eller er til plage for medelevar eller vaksne på skulen.

8.7 Kopi- og materialrom:

Elevar skal ikkje kopiera sjølve eller bli sendt for å henta materiell på materialrommet.

8.8 Skuleveg og buss:

Elevane skal stilla opp i køar ved busshaldeplassen på skulen. 1.klasse skal alltid stå først i køen, deretter resten av småskulen .